



Tir Yimyim



www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



TAPAK 3

ICC T20I rankings: Hardik Pandya temaba jenjangi tuogo

PM Modi-i India-CARICOM tesendaktep atema onük 7 benok



VOL. XXII ISSUE NO. 44 (ADOK 44) DIMAPUR ROFONÜ (FRIDAY) YIMPOKSÜI (NOVEMBER) 22, 2024 ₹ 5.00

Nagaland yimsüsürtemi Amit Shah ajuru

New Delhi, Nov.21(TYO) : Yangi New Delhi nung tanü November 21 nü Nagaland Chief Minister, Wb.Neiphu Rio-i anir Nagaland cabinet minister-temi Union kilo kilonser Amit Shah ajuruogo.

Iba senden nung Naga yimten tebilemsü dak aketba ken o yakta telemetba agidaksünüa jembiba den Eastern Naga Peoples' Organisation-i akangba ken o aser Nagaland-Assam artsü dak aketba tebilemsütem benoka jembia liasü. Iba denji ano

Nagaland nung terenlok mapatem inyaksü nungdakba sentongtem indanga benoka jembioogo.

Iba senden nung Chief minister den Deputy Chief minister, T. R. Zeliang, Deputy Chief minister, Y. Patton, Tourism & Higher Education minister, Temjen Imna Along, Rural Development minister, Metsubo Jamir, Environment, Forest & Climate minister C. L. John Minister aser Horticulture minister Wt. Salhoutuonuo Kruse nungertem dena liasü.

Impur Bible Seminary Serampore University nung züngokogo

Dimapur, November 21 (TYO) : 1955 küm Impur nung laishir 9 agi tenzükba Impur Bible School, koba dang tangbo Impur Bible Seminary ta ajar, iba laishir reju ya Senate of Serampore University nung affiliate süogo.

Iba telemetba ya tanü November 21, 2024 nü Phek district kübok Pfusero nung 99 buba Serampore Senate aser Board senden nung agiogo. Iba

senden nung IBS Principal Wt.Imtilemla Longkumer dena liasü. Joko, tang nungibo Senate of Serampore University kübok Impur Bible Seminary nung ya B.Th jenjang tashi ngua züngtetsü.

Tang Senate of Serampore Univeristy nung Northeast nungi mezüngbuba tetsür rongnung Registrar Dr.Limatula Longkumer lir aser la ya sangküm 2025 küm April tashi inyaksü.

District Hospitals terenlok atema ali tuluba nungdaker: Minister P. Paiwang

Dimapur, Yimpoksüi/Nov. 21 (TYO): Healthcare ki o jen ulushitsü mangdang aliba sayua, tang state tesem ajungalen sema jaja alisang Minister, Health & Family Welfare, P. Paiwang Konyak-i tarutsü nung mozüki ulushia aotsü atema District Hospital temi ali tuluba mekazüksüla/alizüksüla ta ashi.

Minister Paiwang ya Brehostibarnep Longleng District Hospital atong aser PPCA Mission Centre nung district administration, civil societies, district hospital ketdangsür aser department ketdangsür den senden ka mena liasü.

Longleng District Hospital teyangludak aliba semdangba sülen pai District Hospital tem ali tali tuluba alitsü nungdaker, kechiaser ali tulu aliba ajanga dang mozüki ulushia aotsü, ta ashi aser Phom civil society tem dang Longleng District Hospital atema ali tuluba alizüksü/mekazüksü ayongzüka liasü aser mozüki terenlok asoshi bendanga agütsür inyaker ta pai ashi.

Pai tang mozüki teyangludak aliba tekeraba nung renemtsü ajungshi aser nungdakba osettsüset kecha agia manüngtsüla, ta ashi.

Nagaland nung aliba District Hospitals ajanga amai nung specialist doctor tem agi anünga ya tebilemsü tulu lir, aser department ajanga two-cadre-system (Specialised and non-specialised doctors) atema lenmangtem bushiteptar aser sorkari melaba sülen nübu shimba maparen tenzüktsü, ta Minister Paiwang-i ashi.

Survey junga magi easier masadangi Sub-Centres, PHCs aser CHCs tem tapi agi amenoka upgrade asüba ajanga doctor aser nurse tem agi kanga anünger aser iba yongji item centre tem tasen amenokba aser upgrade asüba nokdangtsüsa akum, ta Minister-i ashi.

Nungdakba yari upgrade asütsü aser amenoktsü aser tang aliba centres tem survey agir menüngdakba tem down-grade asütsü atema department-i metetdaksütsü, ta ashi.

Pai anogo-mapang lemsar district ajunga sema jajatsü ta metetdaksü aser iba mapang Dimapur aser Mokokchung district nung inyakba ama food safety inspection aser pharmacy tem semdangtsü, ta ashi.

Raksatsü anogo mali bendang lima nungi chiyongtsü aitba indanga Minister Paiwang-i tebilemsü lemsatop aser itemji azüoktetra local entrepreneurs tem asoshi maongka tali adoktsü ta ashi.

Ango nung formalin aliba indang jembidang, danga state tem nungi bener aruba ango tem nung formalin aliba butetra sorkari tenokdangba agütsütsü aser state nung metsüba ango kisüng amshidaksütsü aser yangjia lanurtem asoshi maongka angutsü ta ashi.

Danga district tem dang nungi tajungba nüburtem CMHIS ajanga yariba asoshia Minister Paiwang-i Longleng District Hospital aser doctor tem nem tenüngsang agüja liasü aser nübur ajungai health care services agitetsüsa lenmang agütsütsü ajungshi.

Ao Lanur Telungjem tentetogo



Tanu Ao Senden Kilem, Mokokchung nung Ao Lanur Telungjem (Interim Body) tentetba sentong agir külen sentong nung adenertem tangokba noksa.angur.

Mokokchung, November/ Yimpoksüi 21 (TYO): Tanu Ao Senden Kilem, Mokokchung nung Ao Lanur Telungjem (Interim Body) tentetba sentong ka Mokokchung Town Lanur Telungjem (MTLT) aser Dimapur Ao Lanur Telungjem (Dimapur Ao Youth Organization) adenshia agiogo.

Ao kin asoshi mera tasen ka agiba Ao Lanur Telungjem (Interim Body) tentetba Ao Senden Tir Wb.Marsanen Imsong-i sangdongtsü aser iba sülen pai mapang tatsüka agia jembidang Mokokchung Town Lanur Telungjem aser Dimapur Ao Lanur Telungjem ajanga tongpo

apua tanga lanur tentet tema ajungshia iba telok nung anioka iba telok tali tashi taitba aotsü asoshi inyaksüla ta ashi.

Lanur telungjem telok ka tentetba ajanga tarutsü nung nüburtem asoshi mera tasen ka agir, tenzükba mapangbo tetsükdaksü jenti ajurutsü saka mangdang takhang yur inyakra iba jagi telok tentetba nükjidong ataloka nübur asoshi mapa tajung tulu intaktetsüta Ao Senden Tirisa ashi.

Ao Senden Tir Wb.Marsanen-isa tanu putu nung lanurtemi maparen ajak ochi agi tasü ita Tsüngrem dak tamang yur inyakra mapatong ajak nung takok

ngutetsü aser iba jagi Naga nunger lokti nung temelenshi bener arutsütsüta ayongzük.

Aor Lanur Telungjem ya Ao Senden kübok mapatong ajak inyaka aotsü aser iba telok tentetba ya Ao Senden Tir-i Ao Lanur Telungjem (Interim Body) tentetba tamaittsü iba Ao Lanur Telungjem nung Convenor MTLT Tir, Imnaonen aser Co-convenor DalT Tir, Tia Longchar asütsü agizükba metedaksütsü.

Ao Lanur Telungjem tamendakdak ka nung inyaka aotsü asoshi Constitution renemtsü asoshi Wb.Imlikumzuk Longkumer Convenor sür telok ka shimtetja liasü.

V.K. Town-Doyang lenmang shidak yanglushiang: Ao Senden

Dimapur, Yimpoksüi/Nov. 21 (TYO): Ao Senden ajanga Deputy Chief Minister, Planning & Transformation, National Highway dangi V.K. Town nungi Doyang tsüngta NH 61 lenmang tapok atepba asoshi tezüluba ka agüja liasü.

V.K. Town nungi Doyang tashi National Highway 61 lenmang nung potholes tem tang lishi agi atema aoba khukhua aitsür, ta Ao Senden-i züluba

shiti nung shia liasü.

Iba dak alia Department of PWD (National Highway) ajanga tasa aser mezüngmeshi mapa tamajungtiba meinyaktetsü aser iba yongji Ao Senden-i tezüluba agütsütsüsa akumer, ta ashi.

Iba zülü agütsür anogo 30 tsüngta lenmang yanglushiba maparen shidak meinyakra onoki ozü den apet mera agitsü aser koda masüba timtem adokra ozü khuret masütsü, ta Ao

Senden-i ashi.

Anungji nübur ajangzüktsü mechi khuret angatetba sorkar indang department ama nungdakba mera agia lenmang tekeratiba nung yanglushitsü ajungshir. Nü lenisüba kübok mapang shidak nung ajak ajangzüktsü mera agitsü imla atar, ta Ao Senden tir Marsanen Imsong aser tongti zülur Imtipokyim nati shiti nung shia liasü.

CS-i lokti nübuttsük atema ayongzük

Dimapur, Yimpoksüi/Nov. 21 (TYO): Benjongbentsü mapang tonga aruba mechi Nagaland Chief Secretary, Dr J. Alam IAS ajanga sangdong ka nung November 22, 2024 nü Kohima aser tesem balala nung lokti nübuttsük alitsü ayongzüka liasü.

Nagaland müreka ayuba nung nübur ajanga longjema aser khuret angatetdaksütsü nükjidong nung iba sentong ya ayongzük, ta ashi.

Libajen müreka ayuba nung asenok ajaki shilem agitsüla aser lenmang, sorkar offices aser ki o jen densema asen meketa aliba tesem müreka aser junga anepalutsü tongtipang lir.

Iba lokti nübuttsük takok angutsü mechi department balala nung ketdangsür aser Heads of Departments ajaki tatishitsü tajung sayua shilem agitsü inlar,

ta Chief Secretary ajanga ashi.

Secretariat nung aliba officers aser staff temi iba social work nung shilem agitsü aser district tem nunga Heads of Offices densema HoDs ajanga dang staff tem anir pei nem nungloktsüba tesem nung lokti nübuttsük anir inyaksü ayongzük, ta ashi.

Metzü meshiba tesem, gari anenba tesem, tetsüng lenmang aser office complexes müketa aliba tesemtem amala tali temulung agüja müreksüla, ta sangdong ajanga ashi.

DC DIMAPUR-I LOKTI NÜBÜTSÜKATEMA METETDAKSÜR

Benjong mapang asoshi renemshia November 22, 2024 anepdang 6:00 ako nungi tenzüka lokti nübuttsük alitsü, ta Deputy Commissioner, Dimapur,

Tinojongshi Chang (NCS) ajanga sangdong ka nung metetdaksü.

Iba sentong nung sorkar mapa inyaker, Dimapur Municipal Council (DMC), East Dimapur Town Council (EDTC), NGOs aser awards, yimtsüng aser colony ajanga nung nüburtemi shilem agitsü.

Iba anogo anepdang 6:00 ako nungi anüngdang 12:00 ako tashi dokan aser businesses ajanga shibanga alitsü, aser aibelener nem temerenshi agütsütsü. Department temi gari agütsütsüla aser nunglokja aliba tesemtem ketdang asütsü aser ward councillors temi nüburtem den yariteptsüla. DMC aser EDTC ajanga public dustbins anepalutsü aser kija shiai mürekmejuba nung amshiba oset bener arutsüla, ta ashi.

Phek, Zunheboto & Mokokchung nung NVBDCP senden menogo



Phek, Zunheboto aser Mokokchung district nung State NVBDCP senden amenba mapang tangokba noksa nung angur.

Kohima, Yimpoksüi/November 21 (TYO): National Vector Borne Diseases Control Programme (NVBDCP)-i ayongzüka Phek, Zunheboto, aser Mokokchung nungi district team tem den August 18 nungi 20 tashi district headquarter tem nung senden menogo.

Senden nung ground-level nung inyakertem inyakyim asadangtsü aser koba lenla nungsa madoksa ali item lenlatem nung terenlok atema sensaksema liasü.

Senden nung o jembiba mapang Joint Director & State Programme Officer, NVBDCP Dr. Neisakho Kere-i Nagaland nungi ramen tashidak meshi meshia samatsütsü koda tongtibang iba indang jembia liasü. Paisa, 2030 küm tashi nungbo India ajunga nung ramen tashidak meshi meshia samatsütsü nükjildong aliba nung shilem ka ama National Centre for Vector Borne Diseases Control Programme (NCVBDC)-i 2027 küm tashi nungbo ramen tashidak meshimeshia samatsütsü asoshi state tem nem tetuyuba

agütsüogo, ta ashi. Dr. Kere-i ramen tashidak meshi meshia samatsütsü tetra takok tulu asütsü aser iba ajanga nisung taküm aika kümzütsü, ta ashi. Paisa, 2009 küm Nagaland nung ramen tashidak nisung 8,984 dak potet aser nisung 35 asü. Ajisüaka jenjang tapet agiba ajanga kümshia tashidak menar tajemba kuma odar aser taoba kümbo nisung pezü dak dang iba tashidak poteta liasü, ta ashi.

Pai ashiba agi, taküm districts tenet nungbo ramen tashidak agi shiranger ka danga meputet, ajisüaka Phek, Mokokchung, Peren, aser Zunheboto nunger nung tashidak potetogo. State nung ramen tashidak poktetba sama odar, ajisüaka tangalen nungi menar aruba ken o tem süoki ia bilemba pai lemsatop, koba prokshia aotsü ana nung lir, ta ashi. Pai, district tem dang meita aoba sentong ajungketshitsü aser state nungi ramen tashidak meshi meshia samatsütsü asoshi merangba mapang kuli kakat tejangja bendena ayutsü ajungshia liasü.

Dr. Kere-i ashiba agi,

tsüingsang mongpu melenshiba aser alima tatsükba akümbe ajanga vector-borne tashidaktem dak kongshir. Ramen tashidak tajemba kuma odar, saka dengue aser Japanese encephalitis amala tashidak taliba kumdar. Paisa, field health worker tem dang, jila aser yimdam yimtsung naprongla nung vector-borne tashidaktem putettsü aser anepalutsü atema kümküma alitsü mepeshia liasü.

Deputy Director NVBDCP, Dr. Timurenla Anichari-ia, district staff tem dang tashidak menatepa aoba mapang tali meranga inyaksü ajungshia liasü. Laisa, ASHA tem (Accredited Social Health Activists) ajungshi aser ki shia-i tua fever screenings asüba mapang sendaktepa inyaksangshitsü ajungshi.

Senden nung district DVBOs (District Vector Borne Disease Officers), DVBCs (District Vector Borne Disease Consultants), Surveillance Workers (SW), Malaria Technical Supervisors (MTS), Statistical Investigators (SI), aser Malaria Inspectors (MI) temi shilem agia liasü.

IDAN-i Heritage Interpreters atema application jaoker

Dimapur, Yimpoksüi/November 21 (TYO): Kisama Heritage Village nung December 1 nungi 10 tashi 25buba Hornbill benjung amungtsü atema Nagaland renemba mapang Investment and Development Authority of Nagaland (IDAN)-i, Heritage Interpreters ama inyaksü atema tejangraratem jaokogo.

Nagaland nung kin balala, sobaliba, otsütem aser libaliro indang tangazükba agüja tesemdangertem nem benjung tajangshiba tajung agütsütsü nükjildong nung iba inyakyim ya benoker.

Heritage Interpreters 150 shimtsü aser parnok ya anogo 10 nü anogoshia ghonda 8 mapa inyaksü.

Interpreters tem nem anogoshia honorarium agütsütsü, koba parnok inyakyim dak ajemdaker agütsütsü.

Angati physical Capacity Building Training ka November 23 nü agütsütsü renema lir.

Teshimtetba nisungtem yagi Kisama Heritage Village, War Memorial, aser State Museum

nung tour tem anir senzütsü, kong kin balala sobaliba, motifs, ken aser otsütem indang alima penzürtem nem tangazükba agüja parnok nem Nagaland indang takar sobaliba tali tajungba angatetdaksütsü.

Iba mapa atema nisung kaji English kanga junga jembiteter ka asütsüla, Hindi mesüra tanga bendanger oshi shia lira maongka tajung ka asütsü, puti otsü zünger alirtem mesüra Nagaland puti otsü aser sobaliba angazüka benshitsu janrartem tangar dang nungi maongka taliba angutsü saka aji mandatory masü. Applicant kaji tangar den jembishinu tajung asütsüla, tawa graduate sür alir mesüra stream mashi ka nung tang college tezüngdak purtem mesüra bendanger oshi shia alirtem mesüra Tourism and Culture graduates/kaketshirtem mesüra tang tour guide tinyakdakpurtem iba mapa atema apply asütsü ayongzükogo.

Mapa asoshi shimertem atema tajangzükji Nagaland indang sobaliba angazüktsü,

benjung mapang mapa inyakba atema Competitive remuneration, cultural tourism dak sendakba nung tajangshiba angutsü atema maongka aser nüburtem den sendakteptsü asoshi maongka angutsü.

Iba mapa inyaksü janrartem dang parnok indang application tem iba number ana 6909797811/8414903666 nung WhatApp ajanga agütsütsü metetdaksüogo. Application den külemi single page basic resume (Name, Age, Year of Graduation or current Semester, College & Course Details, Reference, Languages known) ka densema alitsüla aser o jembir tajung ka ama pei tejangraba aser pei-i inyaktetba tem indang statement tatsüka agütsütsüla.

Application ya November 22 nü tashi nungbo benoktsüla aser training ya November 23 nü agütsü.

Iba training sentong nung tang tinyakdak tour guide tem aser tour guide mapa inyaksü janrartem ajaki shilem agitettsü.

NCSU-i metetdaksür

Dimapur, Yimpoksüi/November 21 (TYO): Nagaland Contractors & Suppliers' Union (NCSU) Head Office Nagaland, Kohima-i sangdong ka ajanga, NCSU züngsem aser NCSU

District Unit ketdangsür ajak dang, November 26 nü nungi tenzüka NCSU Head Office Kohima PWD junction nungi office mapang pending bills format agizüktsü metetdaksüogo.

25buba Hornbill benjung atema Art & Culture department renemer

Dimapur, Yimpoksüi/November 21 (TYO): Hornbill Festival 2024 atema Department of Art & Culture renemdar, koba "Cultural Connect" omen nung ajemdaker agütsü. Department-i achaaayanga December 1 nungi 10 tashi sentong balala ayongzüka agütsü renema lir.

Benjung mapang anogoshia main arena nung sobaliba sentong balala ayongzükba agütsü. State kübok tesem balala nungi Cultural Troupes 18 parnok indang sobaliba sobotsü semer sobaliba tsüingsang aser ken, sobaliba asaya, inyakyim balala aser saya balala sayatsü asoshi yakta arutsü.

World War-II Museum Premises, Kisama nung Artists' Corner/Art Fair ayongzüktsü. Inyakyimtem rongnung Art Show, Transaction of Art, Artist Talk/Presentation, Art Pavilion Exhibition, Art Market & Artisan Boots, Art Demonstrations, Interactive Workshops, Art Installation, Art Battles aser Cultural Art Show densema lir.

Archives Branch-i ayongzükba "Naga-Land & People in Archival Mirror" ta nungja agütsür National Archives of India, New Delhi den

Joint Exhibition sentong ka agütsü. Kakat meimertem atema bushisüngdang, puti otsü bushirtem Monograph, local kin kar indang Dictionary tem, Naga nunger sobaliba inyakyimtem, Archaeological Publications amala departmental publications tem World War-II Complex kübok Exhibition Hall nung angutsü.

Benjung mapang alima puti otsü nung tongtibang tatalokba rongnung ka ajangshitsü aser angatettsü atema World War - II Museum, Kisama semdangtsüla, kong relics aser artifacts tem sayatsü. Museum ya anepdang 10:00 ako nungi nikongtsütsü 4:00 ako tashi nüburtem atema lapoktsütsü.

State Museum, Kohima-a mapa inyakba anogotem nung anepdang 9 nungi nikongtsütsü 3:30 ako tashi lapoktsütsü.

Maneni Department of Art and Culture-i World War - II Museum Complex nung Artisans Corner ka ayongzüktsü, kong Nagaland nung aliba kin 18 prongla nem sobaliba arts aser crafts yangluba nung parnok sempettem sayatsü asoshi maongka agütsütsü.

Mejangjaba tasü mang ka nguteta lir

Dimapur, Yimpoksüi/November 21 (TYO): November 21 nü mejangjaba non-local tebur (arishi küm 20-25) ka Railway Station anasa Flyover Bridge kübok süja or lia nguteta liasü.

Dimapur police-i iba nisungba ya District Hospital Dimapur-i anir ao, saka temang anepalua aliba mapang nisungba ya süatok. Pa asüba dak sendakba nung bushisüngdang süogo, ajisüaka temulu malemetsüsa kecha mongutet. Iba nisungba ya aya tzür agi asü asütsü ta bilemer. Temzüng ozüng dak ajemdaker

tinyaktsü maparen ajak tembanga inyakba sülen tasü mang ya District Hospital morgue-i post-mortem examination/identification atema benerogo.

Asüsang yagi grey jean pant, grey t-shirt aser brown long sleeve shirt ka semer liasü.

Ken o dak sendakba nung asüsanger kinunger aser medemertem dang Officer-in-Charge, East Police Station, Dimapur. (Mobile No. 7085055020) den tongteprateptsü mepeshia metetdaksüogo.

AONOKPU ASER LIRMEN YIMJUNG KÜM 50 AJUNGBA BENJUNG MONG SENTONG

Anogo: 27/11/2024 Mapang: 11:00AM

Tesentepdak: Aonokpu Tenla Ki

SENTONG LENIR : Wb. Merang Sanglir
Pastor, Aonokpu Baptist Arogo

ASÜR BILEMTETBA: Rev. A. Mar Pongen
Pastor, Lirmen Baptist Arogo

1. Sarasademtsü : Wb. B. Atuba Imchen
Pastor, Tsüremmen Baptist Arogo
2. Tarur pelaa agizükba: Chairman, Aonokpu village Council
3. Jubilee tenla bendena mapang
4. Tepelaba O : a) Chairman, Lirmen Village Council.
b) Chairman, Tsüremmen Village Council
c) Chairman, Akumen Village Council
d) Chairman, Aonokpu Yimsen Village Council
5. Yimnasanger Senso atema temoatsü meshia, telongjem sarasadem akatsü
Tanir : Rev. M. Tongpang Imchen
6. Ken Ka : I/c Kr. Talirenla & Sb. Chaluyimba
7. Tenüngsang O : a) Wb. L. Bendang Longchar, Lirmen Village
b) Rev. Sentimeren Jamir, Associate Pastor
Mokokchung Town Baptist Arogo
8. Tatem Sarasadem: Wb. K. Tiameren Longchar
Pastor, Armenkong Baptist Arogo

METETDAKTSÜR

- * Jubilee Chiyungba mapang Sentep temli alitsü.
- * Chiyungtsü meshiteta Sarasademtsü: Wb. Anok Walling Pastor, Akumen Baptist Church
- * Iba sentong nung Yim ana Senso züngsem ajak arua atentsü pelashishia jaoker.
- * Iba sentong takok asoshi ajaki sarasadema atadi.

PM Modi-i India-CARICOM tesendaktep atema onük 7 benok



November 20, 2024 nü Georgetown, Guyana nung 2buba India-Caribbean Community (CARICOM) senden nung Ato kilonser, Narendra Modi den Caribbean partner linüktem nungi lenirtem tangokba noksa nung angur.

New Delhi, Yimpoksüi/ November 21 (Agencies):

Ato kilonser Narendra Modi-i India aser Caribbean linüktem tsüngda tesendaktep tashi itshitsü atema tongti tongshi 7 lemsatep, aser tesendaktep tajungba akümtsü atema India-i inyaksü, ta metetdaksü.

Bodhbarnü Guyana linük nung 2buba India-Caribbean Community (CARICOM) senden nung jembidang Modi-i item o ya jembia liasü.

Ministry of External Affairs (MEA)-i X ajanga, "PM @narendramodi aser CARICOM chair aser Grenada Ato kilonser Dickon Mitchell na lenisüba nung 2buba India-CARICOM senden menogo," ta metetdaksü.

Iba senden nungji lenirtemi rongsenkettzüng, aluyimba, chiyungsü security, health & pharmaceuticals aser science sectors nung amalitepa inyakba tesendaktep tajungba akümtsü atema o lemtepa liasü.

Iba senden nungji Ato kilonser Modi-i India aser CARICOM tsüngda tesendaktep tashi itshitsü atema tongtibang tongshi tenet lemsatep.

C-A-R-I-C-O-M nungja nung ajemdaker Modi-i lemsatepba tongti tongshi tenetji - Capacity Building, Agriculture & Food Security, Renewable Energy & Climate Change, Innovation,

Technology & Trade, Cricket & Culture, Ocean Economy aser Medicine & Healthcare lir.

India aser CARICOM linüktem tsüngda tesendaktepji tesüiba mapang aser tang asenoki ajangshiba nungi lir aser tarutsü nung külem nükjidong nung ajemdaker lir, ta pai ashi.

Modi-i, "Item tesendaktep jenjang tajungba akümtsü atema India-i inyaksü," ta ashi.

Modi-i, "T pongu - trade, technology, tourism, talent aser tradition ajungkettsüsü atema online portal ka yanglua linük ajak nungi private sector aser stakeholders sendakteptsü akok," ta metetdaksü.

"SME (small & medium enterprises) sector nung India tejakleni odar. Yaküm India-CARICOM senden nung onoki SME sectors atema dollar sen million 1 agütsüsü sangdonga liasü. Tang asenoki ibaji mapa kuma inyaksü atema rangloksüla," ta pai ashi.

Paisa, "CARICOM region nung forensic centre ka amenoktsü. India nung sorkar mapa inyaktertem capacity building atema onoki iGOT Karmayogi portal yangluogo. Iba portal ajanga technology, administration, law & education indang online course agütsür. Yamaji CARICOM linüktem atema-a portal ka yanglutsü akok," ta ashi.

O tembangba Ato kilonseri,

"Alima rejutem nung temelenshi nungdak ta India aser CARICOM tembartem ajaki bangjemba atema ni pelar. Tanü lima aser loktiliba nung itemji yangertsü nungdak. Iba ya atangji ataloktsü atema CARICOM den amalitepa alitsü aser CARICOM teyariji kanga tongtibang asütsü," ta metetdaksü.

2019 küm 74buba United Nations General Assembly alidang CARICOM züngsem linüktem nungi lenirtem aser Ato kilonser Modi ajurutepa liasü. Iba mapang nungji parnoki renewable energy aser climate change atema inyaksü bangjem aser iba atemaji India-i dollar sen million 150 apuja liasü.

Bodhbarnü senden nungji Guyana Tir, Irfaan Ali-i, "Coronavirus wara mapang nung nenoki mezüng iba region atema vaccines teyari agütsüba atema onoki nü dang aser India nungertem dang kanga pelar," ta metetdakja liasü.

Ali-isa, "Alima nung India nungler ola nungji tashi lir. Nenoki Global South atema inyaker. Tawa G20 nung nenok lenisüba kübok Global South jenjang ajungtsü atema inyakogo," ta metetdaksü

MEA-i ashiba agi, Guyana nung Indian origin 3,20,000 shi lir. CARICOM nung züngsem linük 21 lir: züngsem linük 15 aser Associate züngsem 6 lir.

Iba region nung nütsüng million 16 lir aser nütsüng shilem 60 bo arrshi küm 30 ser tekübokpurtem lir. Iba region nung tongti lisopur teloktemji Africa nungler, India nungler, Europeans, China nungler, Portuguese nungler aser Javanese nungler lir.

Ato kilonser Modi Brazil linük nung G20 senden nung adenba sülen Guyana linüki aru. G20 senden nung pai US Tir Joe Biden, France Tir Emmanuel Macron aser UK Ato kilonser Keir Starmer nungler densema lenir aika ajuruogo.

Bay of Bengal nung cyclone ajanga Tamil Nadu kongshitsüa akok

Bengaluru, November 21 (Agencies): India Meteorological Department (IMD)-i, Sumatra tzyüimkümlen nungi pilar Equatorial Indian Ocean nung upper air cyclonic circulation ka tentetogo, ta metetdaksü.

Iba yipru ya Brihostibarnepe jangja aser maneni November 23 tashi nungbo southeast Bay of Bengal nung low-pressure area akümtsü aser tesüsa cyclone yipru akümtsü.

Iba yipru ya west-northwest tsütsüleni aotsü aser Tamil Nadu, Andhra Pradesh aser Sri Lanka kongshia tzunglu sashia arutsü aser tzyüim nung tzyüsem tulu alitsü.

IMD-i November 26 nü atema Tamil Nadu, Puducherry aser Karaikal nung orange alert sangdongogo; iba mapang nungji tzunglu 115.6 mm nungi 204.4 mm tashi arutsüa akok, ta tekümdangtsü metetdaksüogo.

IMD-i, iba yipru ya cyclone kümra Saudi Arabia-i nungja agütsüba "Fengal" cyclone ta ajatsü. Tan mongpu nung Cyclone Dana agia India kongshia liasü. Tang tashi nungbo iba yipru lenmangji mejangja ajisüaka iba yipru


ajanga Tamil Nadu yimtiba, Chennai tzyüimkümlen süitsüa akok ta asadangteter.

November 26 tashi nungbo Tamil Nadu, Puducherry aser Karaikal nung tzunglu sashia arutsü, anungji ketdangsertemi renemshia alitsüla, ta IMD-i metetdaksüogo.

Andhra Pradesh nunga IMD-Amaravati director, Stella S-i November 26 nungi November 29 tashi Andhra Pradesh tzyüimkümlen aser Rayalaseema nung tzunglu sashia arutsü, anungji aluyimertemi November 25 tashi nungbo alu aruhtsüla, ta metetdaksü.

Meteorologist temi, iba yipru ajanga tzyüim nung tzyüsem tulu alitsü, anungji angopurtemi taruba anogotem nung tzyüimi angopui maotsüla, ta metetdaksü.

IMD-i advanced satellite imagery aser weather modelling amshia iba tensa maneni mita repringdar. IMD-i mapang shia osang metetdaksütsü, talisa Tamil Nadu, Andhra Pradesh aser Sri Lanka tzyüimkümlen alirtem nem tekümdangtsü osang metetdaksütsü.



November 21, 2024 nü Rudraprayag nung polling ketdangsertemi EVMs aser election osettem Agastyamuni Krida Ground nung amenokba collection centre-i bener arudang tangokba noksa nung angur.

Delhi assembly elections atema AAP-i candidates sangdong

New Delhi, Yimpoksüi/ November 21 (Agencies): Sangküm küm tetenzüklen Delhi nung assembly election agitsü lia Brihostibarnü Aam Aadmi party (AAP)-i mezüngbuba list nung party candidates tenüng sangdongogo.

AAP lenir, Gopal Rai-i, "Aam Aadmi Party-i Delhi Assembly elections (2025) atema mezüngbuba list nung candidates tenüng 11 sangdonger. Party national Convenor, Arvind Kejriwal leniba nung political affairs committee senden nung tenüngtemji agizüka liasü. Menden 11 ya tang AAP MLA tem maliba menden teimba lir," ta metetdaksü.

Taoba mapang BJP lenirtem-Brahm Singh Tanwar, Anil Jha aser BB Tyagi nungler

den taoba mapang Congress lenirtem- Chaudhry Zubair Ahmad, Veer Dhingan aser Sumesh Shokeen nungler AAP candidates mezüngbuba list nungji densema lir. Tawa parnoki AAP nung aden.

Candidates 11 ji Brahma Singh Tanwar, Anil Jha, Deepak Singla, Sarita Singh, B.B. Tyagi, Ram Singh Netaji, Chaudhry Zubair Ahmad, Veer Dhingan, Gaurav Sharma, Manoj Tyagi aser Sumesh Shokeen nungler lir.

2020 küm February ita Delhi Assembly elections nung AAP-i assembly menden 70 nungi menden 62 tashi nung takok nguteta liasü. Bharatiya Janata Party (BJP)-i menden 8 dang angu aser Congress-ibo menden ka nunga takok menguteti liasü.



New Delhi, November 21, 2024: AAP tongti lenir, Arvind Kejriwal-i pa Delhi Chief Minister inyakba mapang nung sen aika indoka official ki yanglushi, ta aija BJP nung lenirtemi longkak aйдang tangokba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, NOVEMBER (YIMPOKSÜI) 22, 2024

Telungjem tuluba asoshi

Tanü Naga nungger asoshi telungjem tuluka nungdaker, anungji iba nungdakji tongtetsü atema Naga nungger lokti tentet tulu tila ajaki kanga temulung agüja inyaksüla. Aji oda, tulu ajak tila nunggi tenzüker, aji alima inyakyim dak aketba lir. Iba tangatetba nung, tanü Naga lima nung kin ana na akangjunshitepa jungtepba nunggi tenzüker Nagaland anüdok, anülü aser Nagaland tiyong pateta Naga kintem telungjem akümbatem ajak nukjidongji pei kija longjemer alitsüba atema masü saka pei kin aser pei telok longjemba ajanga Naga nungger rangben longjemdaksütsü nukjidong yur inyakra, atangji, Naga kin ajak metetmeteta ka küma lungjemer alitsü. Tanü Naga nungger lungjemtsü nungdak jembiba ya Naga yimten nüchiso bushir teloktem ajak telok tenüng ka kübok longjemtsü nungdakba indang jembir masü mesüra political party ka nung Naga nungger ajak adentsü jembir-a masü. Kasaji tang Naga kintem telungjem balala tenteta akaba ajak ya anener ka akümtsü indang jembir-a masü saka Naga nungger temulung ka akümtsü indang jembir aser telok ajak ajurutepdak arok sabang ka alitsü nungdakba indang kanga rongdak nungdaka bilemer. Naga kin atema yimten nüchiso jenjang ka latetsü atema India den yimten ken o benoka jembir NSCN-IM aser NNPGs telok nati India government den yimjung nung Naga yimten tebilemtsü ya tatembang küma latetsü atema ken o tejembitsü tashibo ajak jembio saka metembangtetba timtemji Naga kin ajak ajurutepa jembidak sabang ka makaba ajanga lir. Aji oda, Naga kin ajak longjemer telok ka tentetsüa menügdaker mesüra Naga nungger ajak 'political party' ka nung dang alitsüa makoktsü saka Naga nungger telok balala ajak tangatetbabo ka ser sabang ka nung ajuruteptsübo akoktsü. Aji oda, tang amaisa NSCN-IM teloka parnok kija aser NNPGs teloka parnok kija, nukjidongbo kasa ser nung India government den tangatetep yangluba nung pei pei meten tekong meranga jembir tashibo, asenoki tangar mangmangdaksüba dang asütsü aser asenoksasa asen akhüm samar tangar tsüngdang menüdong kümadoktsü ana nung lir. Joko, asenoki angatetsüba kaji, Naga yimten nüchiso atema Naga nungger tenüng nung telok kati jembiba nung ken o takok ngua renemtsü asübo alemli renemer lila. Iba tangatetba nung Naga nungger telok ajak külemi adenshir tang tashi nung India den Naga yimten ken o jembir tatembang mekümteti aliba tebilemtsü ya reprangshia jembitsü asoshi telok kati ajemalua leniba ka agütsütsü nungdaker. Ken o agi mapa akümtsü atema tatembang kati maruteter dang ashi, India-i Naga nungger tebilemtsü, temeten aser taginüba ajak angateta alitsü imlar aser Naga nungger tsütsüa NNC nunggi tenzüker tang NSCN tashi nung ken o jembirtemi India tebilemtsüa angateter alitsü südi. Aji oda, jembia akaba ken o agi mapa akümtsü atema, joko tangbo, India den masü saka Naga nungger o Naga nungger na khen külemi ajurutepa jembir külenang India dangibo arok terenemba ken o bener aotsü tensa tia agi akanger. Iba lenibaji Naga nungger ajak atema tajung bilemba telok kati tama tangar lenjii oa ayongdentsü kanga rongdak nungdak mapa ka kümogo. Iba atemaji tangar atatsü menügdaker saka NSCN-IM teloki NNPGs telok bushia oagi shisalemsateplasang mesüra NNPGs teloki NSCN-IM telok bushia oagi tangatetep ken o ka jembitetlasang, Naga nungger tang aser tarutsü putu asoshi koda jungla ! Kasaji, Naga nungger ajak külemi adenshia yimten ken o tajung ka lemtetsü atema Naga kintem longjemer tentetba telongjem NTC ama, ENPO ama, CNTC ama, TPO ama aser UNC ama telok kati danga Naga nungger telongjem senden ka danga ayongtetlasang, Naga yimten tebilemtsü kokteta Naga nungger asoshi yimten jenjang tajungtiba ka latetsü anasabai arur süla.

OLEMSABANG

REV. DR. CLARKI TENZÜKBA AROGO OTSÜ

~ Rev. R. Temsü Imchen

(Yashi adok nungi...)

3. Rev. Dr. E. W. Clark Mapang nungi tenzüka Arogo Recordtem: Dr. Clark mapang nung Arogo Record Ayuba indang Nokinketer Mungchen page 80 - 86 nung yamai zülua angutsü:

Molungyimsen nung Mission Station alidang inyakba aser iba mapang Arogo kar tenzüka Dr. Clark-i zülua toktsüba ama dang ajak mesüaka Arogo kar (mezünpurtem) tenzüka indang Engraji nung zülua aliba amaji dang idaki züluzüka toktsür.

1. Merangkong Church: Baptized by Rev. Godhula R. Brown the village of Merangkong (or Nowgong) in the spring of 1881 the following persons, Imo, Imrong, Ungoliba, Samsazilu and his wife Imterkoka, Samong. Imrong died in the summer of 1890 Sd/- E.W. Clark.

2. Haimong Church: Feb.27, 28, 1892. On Feb. 27 there was a meeting with the missionary at Deka Haimong, of the converts who desired baptism. The teacher was also present. After a relation of Christian experience three men were deemed worthy of baptism. On Sabath February 28, there three men were baptized, viz Suakku, Tsüknungnokshi, and Kimung. On Sabath evening there was a celebration of the Lord Supper. At this time also a church was formed at Dekha Haimong Village of which the following are the names. Suaka, Tsüknungnokshi, Kimung. Rongsenchiba and his wife Tongpangkoka, also Tsüknungtoba (the three from Yajang Church). Also from Molung Akangba, Imliba, Talikaba, Imnameri and Mangyanglemla. These persons constitute the the Baptist Church at Deka Haimong. In 1839 (sic) 1893 Pamila and Imnanoken (Lokland) moved to Deka Haimong from Molung: so did Imbangla. Tongpangkoka wife of Rongsenchiba dies 7 Sept. 1893. 1 Jan. 1894 membership 13. 16 Aug. 1894 died Tsüknungnokshi. Sd/- E. W. Clark

3. Yajang Church: On the 26 Feb. 1888 the following ten persons were transferred from the Molung Church to formed a new church at Yazang village. Tsudimeren, Imdanglemba, Immangyangba, Imtengkaba, Koralemba, Reiba, Mangyang, Imshiangba, Tsuknungtoba, Laksangdangba and his wife Tongbangkokla or Tongbangla as she was usually called had been taught by Mrs Clark and had served under her as a teacher. Sd/- E. W. Clark. (shitakba agibo Tongpangla denerbo parnok nisung 11 ta Rev. Dr. Clark record nungji angur). Sd/-E.W.Clark.

Space kümzüktsü atema tanungba arogotem tenzüka küm aser anogo dang zülua toktsür. 4. Wamuken Church: On 30th Dec. 1893 Sd/- E. W. Clark. 5. Lirmen Church: Oct 15 1898. By Beni and F.P. Haggard. 6. Longpa Church: Nov. 12, 13 1898. A church at Longpa was organized on Sunday Nov. 13,1898. Sd/- S.A. Perrine. 7. Akoia Church: Nov. 21 - 22, 1898. by Haggard. 8. Waromung Church: March 6th 1901 S.W. Rivenburg. 9. Asangma Church: Oct. 25, 1902. Sd/- W.F. Dowd. 9. Chungliyimsen Church: Rev. H. B. Dickson on Jan. 4 1903. 10. Nokpu Imjen (Aonokpu) Church: By Dowd.Nov. 16, 1906. 11. Longsa Church: Jan. 29, 1905 by Dowd. 12. Longjang Church: Dowd. On Sept. 3, 1905.

Rev. Dr. E.W. Clark-i Ao kin atema Inyakba kar: Mezüngbuba nung Ao oshi jembiba dak alaka tezüluba maliasü, saka Clark-i Aoyim balala sema senzüdang parnoki jembiba otemji shitipak nung zülua bener arua Molungyimsen nungger dang asüngdangli ta inyakba tatem nungbo 1911 küm Ao Dictionary adoka yutsü. Tanabuba nung 1878 küm Mary Meadi Nagalima nung mezüngbuba tetsürtem school lapok. 1880 August 15, Molungyimsentsür ana tzü nung baptia tetsürtem sentep tenzüker. Tongpanglai tama ni tzü nung baptisü ta ashiba dangji Mary Meadi "Mezüng Nagatsür Ola" ta tenüng agütsür Molungyimsen tetsürtemi iba mission tanü tashi inyaker.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Bible Society of Brazil-i Laishiba million 200 dak tali menüngogo



Bible Society Brazil CEO, Erni Walter Seibert (ajichilen nungi pezübuba) aser tangartem tangokba noksa nung angur.

November 21, 2024: Bible Society of Brazil (SBB)-i Laishiba rangben aser Tasen Lai million 200 menüngba alizüng tongtetogo.

2011 kum tashi nung SBB-i Laishiba million 100 menüngba alizüng tongteta liasü. Iba sülen kum 13 dang lirbo tang million 200 alizüng tongtetogo.

Iba ya ajanga nüburtemi Laishiba kanga nungdakba kuli jangjaba den külemi global network of Bible Societies kübok SBB-i kanga meranga Lai meyipba, menüngba aser alemba jangjar.

Tesüba kum aika tsüngda Bible Society of Brazil-i oshi 87 nung Laishiba meyipzüka adoka linük 122 nung lemstögo.

2023 kum alima nung Laishiba million 152 lema liasü aser Laishiba teimtiba alembaji SBB-i liasü (million 32). Iba dak alia Latin America nung Laishiba teimba menünga alemba organization ji SBB lir.

SBB-i company indang Lai menüngba dang masü saka Laishiba rangben aser Tasen Lai aika meyipzüka menünger.

SBB-i menüngba Laishiba million 200 nungjagi shilem 70 bo Brazil nung alemer aser tanüngba shilem 30 ji (Laishiba million 60 shi) alima tesem balala nung alemer.

SBB nung CEO, Erni Walter Seibert-i, "Laishiba kati nisung ka ket tongra Laishiba million 200 jagibo nisung million 200 ket atongtsü. Ajisüaka Laishiba kaji nisung ka dak talii lemsatapa azünger," ta metetdaksü.

SBB-i "Bible: The Reference - Reconciliation in Family and Society," omen ajungkettsütsü, kechiyong rara mapang nung yimjung aser tangatetba tajung atema Lai otem kanga nungdak. Iba mission dak sendakba nung 2022 kum Bible Society-i Ukraine nung oshi nung adokba tasen Lai 100,000

Ukraine-i yok. Rara mapang tesünep aser teimla agütsütsü nükjidong nung Ukraine nung dangi Laishiba yok.

SBB-i tang tashi nung Laishiba million 200 menüngba nungtem nung November 7, 2024 nü Tsüngrem nem tenüngsang agütsüba sentong ka agiogo. Iba alizüng tongtetba nungtem nung SBB-i Laishiba edition tasen ka adok. Iba edition nung New King James Version, Stuttgart Hebrew Bible aser Greek New Testament densema lir.

SBB indang Laishiba edition tasenba ajanga Brazil nungertemi Ibri, Aramaic aser Greek oshitem nung Lai tekongtem züngtettsü.

Kum shia Bible Society of Brazil-i tanurtem, tepuokdak alirtem, hospital nung shirangerem, matamabensartem aser temesepba mozü lartem 3,50,000 shi nungita yarir.

Turkey nung Khristantem anema inyakba anasü agi tali kumogo

Yimpoksüi/November 21, 2024: 2021 kum nungi 2023 kum tashi nung Turkey linük nung tesempa agi Khristantem anema inyakba tatalokbatem anasü agi tali kumogo, ta International Christian Concern (ICC)-i metetdaksü.

Yimsü temeden atema inyakba melungtet telok Freedom of Belief Initiative (FOBI)-i, 2021 kum Turkey nung Khristantem anema inyakba shilem 10 aliba nungi 2023 kum tashi nungbo shilem 22 akum, ta metetdaksü.

2020 kum nungi tenzüka Turkey nung Khristantemi yimsü nung ajemdaker reshikangshi kanga bulua ajangshir; 2020 kum item ama tatalokba 52 liasü.

Item tatalokbatem rongnung Khristantem meyong kiojen raksatsüba, amokmerenba aser Khristantem dak azükba densema lir.

FOBI-isa, Khristantem anema inyakba tatalokbatemji iba dang nungjagi teimba asütsüa akok, kechiyong tetsübu agi aikati item ama osang memetdaksür, ta ashi.

Organization for Security and Cooperation in Europe (OSCE)-ia Europe kübok linük aika nung tesempa agi Khristantem anema inyakba tatalokba kanga bulua kumogo, ta metetdaksü.

Yakum October ita nung Muslim nung ka Tenla ki telungi atuba sülen Islam sarasadem agi aser pastor dak tejak nung maokja liasü.

Yakum May ita nunga Khristan tain ana dak azük.

Turkey nung Islam yimsü amangertemi bendanger missionary tem anema-a inyaker.

Alliance Defending Freedom (ADF)-i ashiba agi, "Turkey nung ketdangsertemi

Khristan pastor tem, missionary tem aser parnok kinüngertem amokmerenba sülen linük nungi meindoker aser tanaben linüki arutsü memelar."

Alima nung Khristantem alitsü linük tamajungtiba 50 rongnung Turkey ya jenjang 50 buba nung lir (Open Doors' World Watch List).

Akhidang nungi Turkey nung Khristantemi

reshikangshi ajangshia arur saka tanü putu nung tensa ano tamajungba kumogo. 1915 kum aser 1916 kumtem nung Armenia Khristantem anema apusodang Khristan million 1 shi tepseta liasü. Ottoman yimsüsürtem tetuyuba kübok Khristan jenti tepset aser aika aya agi asü.

1914 kum matongdang tashi nungbo Turkey nung nütsüng shilem 25 bo Khristantem liasü saka tanübo Khristan nütsüng shilem 5 dang kumogo.

ANOGO ABEN TSÜNGREM DEN

Pa asenok den teti lir

"Aser süngyanglu den Tsüngrem tenla ki kechi nung puteptet? Kechiaser asenok takum Tsüngrem tenla ki, Tsüngremi ashiba ama, ni parnok rongnung alitsü, aser parnok rongnung jajatsü: aser ni parnok Tsüngrem alitsü, aser parnok kü pur alitsü." (2 Kor. 6: 16).

Khristantemi ajangshia aruba nung tasak kaji Khrista dena aliba takum nung yimya ka ama sayutsübaji lir.

2 Korint 6:16 nung Tsüngremi Korint nung aliba tamangertem dang nenok Tsüngrem tenla ki, kong Tsüngrem alir ta ashir. Tsüngrem nenok dak alir. Ammang aser tesangwa külemi taktang ka agitsü makok ta ashir. Tanü iba kasa o jagi asenok Khristantem den jembir. Tsüngrem o-i asenok takum temenen nung mejajai Pai mulungba lenmang nung jajaang ta ashir. Khristantemi Tsüngrem na onok den liang ta pangpet süa mepishir, saka Pa teti asenok den alitsü Pai nangzüker asunungji iba tenangzüka dakji amangtsüba dak alema, monga mepishitsü menüngdaker.

Korint nung ama, tanü aikati Tsüngrem dena aliba memeteti alir. Shirnoki Kibuba parnok den alitsü sarasadem, parnoki "Ni metet Pa kü dak lir" ta shitettsüla.

Uganda nung Muslim nungertemi Khristan yimsü agizüker ka tepset

November 21, 2024: yimsü tokjang ta ashi saka pai Anüdoklen Uganda nung memelung.

Islamic school ka nung Muslim nungertem, hospital nung shirangerem, matamabensartem aser temesepba mozü lartem 3,50,000 shi nungita yarir.

Arrshi kum 32 Wanjala Hamidu ya Nankoma, Bugiri District nung aliba Swidiki Islamic School nung tesayur inyaka liasü. Islamic school ji Masita yimdak par kidang nungi kilometer 4 dang pilar lir.

Pai Yisu Khrista agizükba metetba sülen par adianutemi pa tepset.

Bulange nung evangelistic sentong ka nung Hamidu aser par adianu Wulasiyo Swamadu na adenba mapang nung pai Khrista agizük. Iba sentong tembangba sülen Hamidu bo maneni Khristan yimsü angazüksü atema ataa liasü saka Swamadu bo kidangi shilangba sülen par kinüngertem dang Hanidu-i Khristan yimsü agizükogo, ta metetdaksü.

Hamidu-i Khristan yimsü agizükba osangji Masita yimdak nung dang masü saka Islamic school nunga prokshi. Ibayongji pa Islamic school nungjagi meindokba sülen pa kidangi meyipa arudang par adianutemi pa dang Khristan

yimsü tokjang ta ashi saka pai Anüdoklen Uganda nung memelung.

Ibayongji par adianutemi pa tepset.

Iba tatalokba sülen police arudang par adianutem jena oadok.

Local council security-i maneni par adianu pezüji bushidar, ta osang ka ajanga metetdaksü.

Islamic tesayuba nung tanga yimsü dangi meyipbaji ozüng alema lir aser tasüba temerenshi agütsütsüa akok.

October ita kija nung anüdoklen Uganda nung Khristan ana tepsetogo. October 30 nüa Islam yimsü alia amangertemi sayutsünger Emmanuel Dikusooka tepseta liasü.

Arrshi kum 29 Emmanuel Dikusooka ya tanur asem tebu liasü. Kaliro District nung pai sayutsüngiba sülen Muslim nungertem 18-i Khristan yimsü agizüka liasü. Ibayongji Muslim nungertemi tejashi nung pa tepset.

Uganda nung nütsüng shilem 12 dang Muslim nungertem lir, ajisüaka anüdoklen tsütsü Muslim nütsüng aika alidak mapang shia Khristantem anema inyaker.

AO OSHI ANGAZÜKDAK:

TANÜ ANGAZÜKTSÜBA OJANG



Tashi

(adj) tasazük tatemba (upto this)

* Parnoki ni ozü ki tashi meinoktsü.

Tashi

(adj) chiyongtsü raksadokba (rotten)

* Chiyongtsü tashi machitsüla.

OLONG PAITEP # 6989

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S _ _ _ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatemba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

OLONG PAITEP # 6988 TELANGZÜBA

TIPIEN :

- 2. Bangsemo, 6. Tiptem, 8. Jen,
- 9. Talilla, 11. Aren, 12. Tzübo, 14. Alia,
- 16. Angati, 17. Odi, 18. Azü,
- 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
- 5. Milen, 7. Tulu, 10. Laza, 11. Aben
- 12. Tiyong, 13. Ajizük, 14. Aitsü,
- 15. Tasa, 16. Aina.

NAI-A YA METETTER MA



Taoba mapang One Direction züngsem Liam Payne den asüpila sentong Bodhbarnü Amersham, Buckinghamshire nung agiogo. Liam ya arishi küm 31buba nung October 16 nü CasaSur Palermo Hotel, Buenos Aires, Argentina nung asü. Bodhbarnü asüpila sentong nung One Direction züngsem Harry Styles, Zayn Malik, Niall Horan, aser Louis Tomlinson nunger ajaki shilem agiogo aser fan temi parnok tanaben longjemba ya ajak dang tejashitiba telongjem ka asütsü ta shiogo.

Meghalaya nung atangba naring Dubai-i yokogo



Shillong, Yimpoksüi/ November 21 (Agencies): Meghalaya nungi tawa Khasi Mandarin oranges metric tonne ka bendangleni yokogo. Iba naring ya 2015 küm Geographical Indication (GI) tag ngua liasü aser tang cargo ka ajanga Dubai-i yokogo.

Meghalaya department of agriculture and farmers welfare-i, Khasi Mandarin oranges ya November 18 nü Dubai-i yoka liasü.

Iba inyakyim ajanga state nung aluyimertem alima nung

shishilembadaktem den sendakteptsü aser mapang talangka nungi logistic aser rongsenketzüng dak sendakba nung tetsükdaktsü aliba bentettsür.

Lulu Group International, Mother Dairy Fruits & Vegetables Private Limited, aser National Cooperative for Organic Limited amala tongtibang partner tem den longjemer Meghalaya-i state nung aliba aluyimertem alima nung shishilembadak balala den sendaktepja arudar.

2022 küm Khasi Mandarin oranges aser jiru metric tonne pongu Middle East-i yoka bendangleni state nung adokba chiyongtsütem yokba ya tenzüka liasü.

Senotsü tajemba intoktsü atema Meghalaya department of agriculture and farmers welfare-i khu belenshirtem den sendaktepa inyakdar, aser iba ajanga aluyimertem nem taah tali agütsütettsü.

State-isa, jiru aser naring amala state nung adokba süngjangtem ajungkettsü atema sentong balala yongzüka arudar, kong New Delhi aser Bengaluru nung Khasi Mandarin festival ayongzüka densema lir.

Item sentongtem nung state nung adokba süngjanglijang tajungtibatem sayar aser iba ajanga nüburtem timba tongteta shishilembadak tasen den sendaktepdaktsür.

Meghalaya sorkarisa, renewable energy teyari agüja primary aser secondary value addition atema aluyimertem jenjang ajungkettsütsü asoshi inyakdar.

Azütokshi lendong tali akümba mapang Manipur-i sepai talila yokogo

Imphal, Yimpoksüi/ November 21 (Agencies): Manipur nung tawa asendeshir azütokshi lendong tali küma aoba mapang ka nung Central Armed Police Force (CAPF) company ti Bodhbarnü state yimtiba Imphal tongaogo.

Item sepaitem ya Imphal tonga mao tsüngda anogo ka tejakdang ano CAPF company 11 Manipur tongogo.

Central Reserve Police Force (CRPF) aser Border

Security Force (BSF) nungi company pezüzü Bodhbarnü Imphal tongaogo aser parnok ya state nung mepetmesü adoker aliba tesemtemi yoktsü.

Osang ajanga ashiba agi CRPF company tem rongnung kabo Mahila Battalion nungi yoka lir.

Centre-i tawa Manipur nung mepetmesü adoker aliba azüoktsü atema Central Armed Police Force company 50 yoktsü ta sangdongogo. Manipur nung taoba hopta

nungi asendeshir azütokshi lendong tali küma odar.

State nung kin ana tsüngda mangatettep adokba sülen tang tashi nung nisung aika taküm samaogo aser iba den kin anaprongla nungi nüburtem aika pei ki toktsür jenshia aotsüsa kümogo.

Sorkari tensa maziükteti aruba mapang ka nung yimden yimsüsüba daka kongshia Manipur nung NPP puri CM Beiren-i aniba sorkar tsüoktsüogo.

Mizoram: Security forces-i sen crore 85.95 alang temesepba mozü apu

Aizawl, Yimpoksüi/ November 21 (Agencies): Mizoram kübok Champhai district nung security forces-i meita aoba sentong ana ayongzüka agiba mapang sen crore 85.95 alang temesepba mozü puogo.

Osang tejangja angazükba sülen Assam Rifles aser Mizoram police na longjemer district kübok Indo-Myanmar arrtsü anasa Zokhawthar tesem nung meita aoba sentong ka ayongzüka liasü.

Meita aoba mapang sepaitemi nisung telok ka temulung malemtsüsa inyaksangshiba lazüka liasü.

Ken o ashishiba mapang item nisungtem ya jena ao saka parnoki bena aliba oset toktsür jena oa liasü.

Yangku kanga junga lapoka asadangba sülen methamphetamine tablets seret 28.52 nguteta liasü, koba shishilembadak sen crore 85.56 alang asütsü.

Tanga meita aoba sentong

ka nung paramilitary force aser state police-i arishi küm 32 tain tebur ka aser arishi küm 35 tain tetsür ka pua liasü.

Tena pua bushisüngdangba mapang international shishilembadak sen lakh 39 alang heroin gram 52 nguteta liasü.

Ken o ashishiba sülen, tena ya Myanmar nungi ta jangaogo.

Kasa team yagisa, Kenbo bike ka apu, koba India nung ameshitsü memelar. Temesepba mozü shibelentsü atema tenati iba Kenbo bike ya amshia liasü.

**OFFICE OF THE PROJECT MANAGEMENT UNIT
NAGALAND FOREST MANAGEMENT PROJECT
NAGALAND, KOHIMA**

(A non-profit society under Department of Environment, Forests and Climate Change)

No. NFMP/ROJB/2019/43/4992-B Dated Kohima, the 18th November 2024

ADVERTISEMENT FOR CONTRACTUAL ENGAGEMENT

Nagaland Forest Management Project Society (NFMPs)- JICA assisted project intends to engage personnel for Nagaland Resource Organization on Jhum and Biodiversity (NROJB) Office Dimapur on contractual basis for the following position:

A. Team of Experts, Headquarter: Dimapur, SEFTI Campus.

Sl. No.	Position	No. of vacancies	Code No.
1.	Director cum Forestry/ Biodiversity Expert	1	ROJBA

Application Proforma, General guidelines and Terms of Reference may be downloaded from www.nfmpjica.org.

Sd/-
**Project Director (HRD, Research & Extension)
Nagaland Forest Management Project.**



SHISATSÜ, TASÜTAIT, TEMERANG ASER TEMEIM NUNG KÜM 100


Ajungba tepela Tsüngrem tenüngsanga lemsateper. Ano la nem arishi talang moajang ta sarasademtsür.

HAPPY BIRTHDAY Wt. YASHILILA LONGCHAR (LONGKHUM) Asoba anogo : 22.11.1924

NA KENYONGI BALAKAASER ONOKI NA TUSHIR!

Khrista nung, Temeim Kinungertem.

MULUNGEN O



Tasoba Anogo : 28-10-1929 Tasüba Anogo : 13-11-2024

Onoki teti dang meima aliba obala, asür C. R. Subongyimchen (Mokokchung Village) Tsüngremer yongsük ajangdanga arishia lir, pa shiranga aliba mapang nungi tenzüka tasüba anogo tashi kija kibong aser lokti balala shirnokisa nübu, rongsen, shisatsü aser tamang sarasadem ajanga onok den yaritepa arudagi, nenok kija aser lokti shia dangi tsüngdong marutetaka iba sabang ajanga ajak dang pelaba lemsateper. Nenok temeim aser aria bilemba mapa tajung asoshi onoki kecha meyipa magütsüteter, saka Tematiba asen Teyanglur Tsüngremi nenok ajak moajangni ta ozü tamang sarasadem.

Temem Kinungtsü, Chirnur, Semchirtem, Anükapang aser Kinungertem

DEEDS FOR GOVERNMENT EMPLOYEE FOR CHANGE OF NAME/ SURNAME AND TRIBE IN THE SERVICE BOOK

By THIS DEED I the undersigned Medemtsungba Ao lately called Medemtsungba (former name) employed as UGHT (Department and designation) do hereby :-

- 1. Wholly renounce, relinquish and abandon on the use of my former name of Medemtsungba and in place thereof do assume from the date thereof the name of Medemtsungba Ao. So that I may hereafter be called, known and distinguished not by my former name of Medemtsungba but by my assigned name of Medemtsungba Ao.
2. For the purpose of evidencing such my determination, declare that I shall at times hereafter in all records, deeds and writings and in all proceeding, dealing and transactions private as well as public and upon all occasions whatsoever use and sign the name of Medemtsungba Ao as my name in place of and in substitution for my former name of Medemtsungba.
3. Expressly authorities and request all persons at all times hereafter to designate and address me by such assumed name of Medemtsungba Ao.
4. In witness whereof I here unto subscribed my former and adopted name of Medemtsungba and affixed my seal this day of 3rd September 2024.

Old signature [Signature] New signature [Signature]

Signed and delivered by the above Named Medemtsungba Ao formerly Medemtsungba in the presence of :- [Signature]

METETDAKTSÜR

Tir Yimyim Adok 17th September, 2024 "Nangzüker" nung Mr. Talikokba Lkr S/o Lt. Imdongpongba Debuia, koba sen Mrs. Temjensangla ajanga agizüka pa nem agütsüogo, item sen ajakji ni agütsütsü aser kü khuret (Dated 03/07/2023 nangzüka zülutepba) aji onoki magizüker. Nena tsüngda kechi agütsütepogo aser zülutepogo, onoki memetet. Mrs. Temjensangla ket nung onoki senji agütsü, anungji la ket ajanga onok nem December 2024 tashi nung meyiba magütsüra mashi okadak ka nung jembitsü.

Sd/-

- 1. Arenla 2. Alongba 3. Wapang 4. Lipok 5. Sunep

Israel-i northern Gaza nung amakdang nisung aika tepset

Jerusalem, Yimpoksüi/Nov. 21 (Agencies): Israel-i tayimtsü amshia Bodhbar aonung northern Gaza nung amakdang nisung aika tepset ta ashir.

Paramedics aser Hamas den sendaktepa aliba osangtem ajanga ashiba agi, Beit Lahia jila nung Kamal Adwan mozüki anasa tesem balala nungi jenoka aliba ki ishika nung amakdang tetsür aser tanur densema nisung 66 asü. Mejangjaba video ka nunga nisung tasümgang 20 dak tema yimtung nung yua aliba nguogo.

Ano Gaza City kübok Sheikh Radwan kiyong nung ki ka amakdang nisung 22 tepset, ta Hamas meyong Civil Defence agency ajanga ashir.

Israel mitkar nungi iba tatalokba atema sangdong kecha agüja mali. Tawa parnoki Gaza north tsütsü asendenshir amaker, aser Hamas telung kumshiba nungi nokdangar ta ashir.

Ano Brehostibarnep Gaza tesem balala nung Israel-i amakba osangtem lir. South tsütsü Khan Younis yimti nung aliba mozüki kati ashiba agi, Israel mitkari yangji aser anasa Rafah nung amakdang tepsetba nisung tasümgang 24 mozüki nung bener arua lir.

Gaza north tsütsü tesem balala nung Israel-i maneni maktar aser anogo 40 nung humanitarian aid magütsüteti arur, ta UN-i Mongulbarnü tekumdangtsü shia liasü.

Gaza medics temi yirur alirtem yaritsü tim atemer ta ashir aser teyari agütsüba telok balalai yangji nungdakba osettsüset magütsüteter ta ashir.

Hopta tetenzüklen Israel-i tayimtsü amshia Beit Lahia nung aliba five-storey residential block ka amakdang nisung 34 asü, ta civil defence agency ajanga ashi.

Israel-i Gaza north tsütsü alilen nungi amakba ajanga tesüiba hopta pongu tsüngta nisung 130,000 jungnüa pei ki yutsür tesem balala nung jenoka lir.

Nisung 75,000 alidak tesem nung meketbanger amaker aser Beit Lahia, Jabalia aser Beit Hanoun jilatem nung tzü aser chiyongtsü supply ajema kumogo ta UN-i ashir.

Taoba hopta Human Rights Watch ajanga report ka agütsüba nung Israel-i asaa Gaza nung Palestine nunger tesem balala nung jenshitsüsa 'war crimes' aser meimchir anema mapa tamajung inyaker ta shia liasü.

Gaza indang nütsüng yongsük shilem 90 - 1.9 million - tesüiba küm pei ki yutsür jenogo aser iba territory nung shilem 79 shi nung Israel-i nüburtem dang ainshitsü totuyuba agüja lir, ta UN-i ashir.

Hamas-i October 7, 2023 nung Israel south tsütsü maka nisung 1,200 shi tepseter ano nisung 251 pua bener aoba mechi telangzüba agüja Israel-i

iba telok ya samatsütsü asoshi Gaza Strip nung makyonga arutar.

Iba sülen Gaza nung nisung 44,000 jungnüa tepsetogo aser 104,000 dak tema yirutsüogo, ta Gaza nung Hamas meyong health ministry ajanga ashir.

Bodhbarnü US-i UN Security Council nung Gaza ceasefire draft resolution ka nokdanga liasü, koba rara tenzüker par tembar Israel kumzüksü mechi veto tashi pezüben buba amshir alitsü.

Council züngsem 15 aliba nungi 14-i iba draft bhukuma vote agütsü, kong Gaza nung rara ya tangsa condition kecha meyui teti asoshi tembangtsüla aser pua alirtem tekeraba nung chiochtsüla, ta shia liasü.

Deputy US ambassador to the UN, Robert Wood-i iba document nung ceasefire aser pua alirtem choktsü asoshi nungdakba tesendaktep ka senzüka yutsü ta ashi.

Senden nung benokba pangzüng yagi Hamas dang yimjung ken o jembidangi tanaben arutsü nungdak mali ta lendong aketba osang agütsüla, ta Wood-i ashi.

Ano US mediator Amos Hochstein ya Lebanon nungi Israel-i aruogo ta ashir.

Lebanese sorkar aser Hezbollah teloki US ceasefire proposal timba mulungba sülen Lebanon nung rara tembangtsü asangsang maongka angur, ta pai ashi.

Russia-i tang mezüngbuba Ukraine dak ICBM khaloktsü

Moscow, Yimpoksüi/Nov. 21 (Agencies): Russia-i tayang kepzüka Brehostibarnep Ukraine dak southern Astrakhan region nungi intercontinental ballistic missile ka khaloktsü. Moscow-i iba rara nung iba ama tashi tulu aliba long-range missile amshiba tang mezüngbuba alitsü.

Ukraine-i tan hopta US aser UK linüktemi yangluba missiles amshia Russia linük telung nung military targets amakba sülen tang ibai ataloker aser anogo 1,000 junga rara aruba tesashiba kumdaktsür.

Intercontinental ballistic missile ya rara nung kodanga mamshidang aser iba yagi Ukraine tiyonglen Dnipro yimti nung tongtipang ki o jen nung tenük yoker khaloktsü, ta ketdangtsür temi ashi saka teraksa agütsübabo mashi.

Kyiv-i UK aser US long-range missiles Russian position nung khaloktsüba asoshi tayang kepzüka Kremlin-ia missile tasen aser tulu amshia linük

amaktsü amokmerena liasü, ta Ukrainian media ajanga Bodhbarnü ashi.

Tayimtsü amshia amaktsü tetsübo nung United States densema anüolen linük temi Brehostibarnep Kyiv nung parnok indang embassy tem shibangogo, ta Department of State Consular Affairs ajanga sangdong ka nung ashi.

US-i yangluba long-range missiles khaloktsür anogo ka tsüngta Ukraine-i ano British "Storm Shadow" missiles amshia Russia nung aliba military targets amak, koba Moscow-i ita aika nungi inyakra rara tesashiba akumtsü ta tekumdangtsü shia arua liasü.

Missile ya Russia indang Kursk region nung mitkar indang ki o jen nung tenük yoker khaloktsü aser kar Black Sea anasa rongnendak Yeysk yimti anasa khazüka yok, ta mitkar den sendaktepa aliba Russian channels ajanga ashi.

Ukraine indang arütsü nung aliba Kursk region nung missile khaloktsüba aser meta talang

nung 14 ben ola tulu adoka apokba aser mokozü adoka aliba nguogo, ta yangji alirtemi ashir.

US Tir Joe Biden-i Kursk region telung aser temeket nung missiles amshitsü Kyiv nem totuyuba agütsüba sülen US-i yangluba Army Tactical Missile Systems (ATACMS) amshia Ukraine-i Russian targets maka liasü.

January ita Donald Trump-i White House nung Biden melenba sülen Ukraine nem US-i teyari agütsüba yimya melenshitsü akok ta aikati bilemer.

Intercontinental ballistic missile (ICBM) ya tongtipang long-range weapon lir, kong nuclear warheads amshitetsüsa yanglu. Center for Arms Control and Non-Proliferation ajanga ashiba agi nuclear missiles ya tabu aika lir aser meta kilometre meyirijang aika tashi oteter aser anüngleni 9,000 km tashi tuteter. Item missiles ya targets nung m e z ü n g - m e z ü n g a khaloktsüteter,

Mezüngbuba ICBM ya 1957 küm Soviet Union ajanga yanglu aser iba sülen 1959 küm United States-i yanglua liasü.

ALI AYOKER

FOOTHILL LEMANGANASA VIHOKHU NUNG ALILEPSA-AAYOKER. TALITSÜ KIMONG ATEMA TAJUNG ANUNGJI TALINUR TEMI IBA NUMBER NUNG CONTACT SÜANG. SQFT. NUNG 80/- DIRECT CONTACT : 6009530632 / 6009094225

SQAY Martial Art Association of Nagaland-i tenüngsang agütsü



Dimapur, Yimpoksüi/November 21 (TYO): 3buba SQAY Martial Art National Championship 2024-2025 nung Nagaland nungi Pushen aser Khuming nati kanga junga asaya-a Senior Category nung bronze medal anguba atema SQAY Martial Art Association of Nagaland-i tena nem tenüngsang agütsüogo.

Iba asayamung ya Maharashtra nung November 18 nungi 20 tashi asaya liasü.

Nagaland nungi ajak senteper asayar pezü aser coach kati iba asayamung nung shilem agiogo. Khuming (66kg category), Luping K (66kg category), K. Pushen (62kg category), Henu (70kg category) aser coach Gabriel nunger Nagaland tenüng nung oa iba asayamung nung shilem agiogo.

Pushen aser Khuming nati iba asayamung nung takok tajung anguba ajanga state nem konang nüngsang bener arutsüba dang masü saka iba ajanga lanurtem martial arts aser asaya balala jangrabangra aser bendanga agüja asayatsü

ajungmsotsü.

Iba takok ajanga Naga nung lanurtem dak sempet aika aliba aser talisa yimdak yimtsüngtem nung sempet tajung aketba asayartem aliba tali jangja sayur.

Ajisüaka tia maka item lanurtem ya aibenbo mezüngshi aser state, national aser international jenjang nung parnok sempet sayatsü asoshi maongka magütsür.

Nagaland kübok yimdak yimtsüngtem nung aliba lanurtem dak sempet tajung keta lir aser parnok stamina kanga tajang lir, ibayongji parnok alima nung temaba jenjang nung aliba asayartem den toktepa asayatsü asoshi temsüa kümdaktsür. Ajisüaka parnok sempetem ya aibenbo mamshir, kechiyong parnok sentoka toktsür, mesüra tesakloker kar nemang shilem agidaktsür aser kin, kidong aser tesem kecha mebendangi inclusive sports policies maliba ajanga aiben item asayartem ya sentoker.

Asayartem jenjang kecha mesükshi-i sempet aketba

asayartem bushiteta anitettsü atema rangloker inyakra alima nung saisapong nung Nagaland-ia alizüng tasen tongtettsü.

Tawa shimba SQAY Martial Art Association Nagaland tir Lepzungchiba Jamir-i iba ken o indang lemsatapa liasü. National games nung asayatsü atema maongka aliba indang angazükba sülen pai grassroots levels nungi asayartem shimtsü asoshi rangloker inyakra liasü aser iba sülen pei sempet dak ajemdaker yimdak yimtsüngtem nungi asayartem shim.

Alirongsen agia anünga liaka association-i parnok nem ita ka atema training agütsüogo aser tanga state nungi asayartem ama facility agütsütsü merandangogo. Mapang tatsüka dang training agiaka team-i bronze medal anabo nguogo, koba parnok dak temlungtetba tulu aliba aser sempet tajung keta aliba kuli lir.

Item takoktem ajanga Nagaland sorkar-i inyakyim melenshia structured training programs tem asoshi senotsü intoktsü aser ajak nem kasa maongka agütsütsü ayongzükter.

ICC T20I rankings: Hardik Pandya temaba jenjangi tuogo



Yimpoksüi/November 21, 2024 (Agencies): Tawa sayba ICC T20I rankings nung India nunger asayar Hardik Pandya maneni all-rounder rankings nung temaba jenjangi tuogo.

India-i tawa South Africa 3-1 agi akokba asayamung nung kanga junga asayaba sülen Pandya maneni number one asayar kümogo. Iba asayamung nung pai batting aser bowling naprongla kanga junga asayaogo.

India nungersa Tilak Varma, ICC Men's T20I batting rankings nung top 10-i iogo.

South Africa den asayaba mapang pai century ana yanglua asayamung tepeyong nung run 280 yangluba sülen pa jenjang 69 tejakdangi tua top 10-i iogo.

Verma-i kanga junga asayaba sülen pa nem Player of the Series naroküm agütsü aser pa T20Is nung India nunger batter tem rongnung temaba jenjang nung lir. Pa tang tasembuba jenjang nung lir aser captain Suryakumar Yadav dang nungi jenjang ka agi timba lir.

Kasa mapang nung India nunger batter Sanju Samson-a T20I batting rankings nung 22bubai tuogo. South Africa den asayaba mapang paia kanga junga asaya liasü.

South Africa nunger batter Tristan Stubbs (23rd) aser Heinrich Klaasen (59th) nata T20I batting rankings nung tejakdangi tuogo.

ICC Men's T20I bowling

rankings nung India nunger left-arm pacer Arshdeep Singh tekububa nung lir, koba pa indang career nung tang tashi nung jenjang tajungtiba lir.

T20I bowling rankings nung Australia nunger Adam Zampa aser Nathan Ellis nata tejakdangi tuogo.

Tawa New Zealand madak takok anguba sülen Sri Lanka nunger asayartem T20I aser ODI rankings nung tejakdangi tuogo.

T20I batting rankings nung Kusal Mendis 12bubai tuogo aser ODI bowling rankings nung Maheesh Theekshana trokbuba nung lir.

Sri Lanka nunger batter Mendis aser Avishka Fernando nata ODI batting rankings nung tejakdangi tuogo aser Sri Lanka den asayaba mapang kanga junga asayaba sülen New Zealand nunger asayar Will Young 22bubai tuogo.

Bihar sorkar, HI nati India tetsür hockey team senpettsütsü

Yimpoksüi/November 21, 2024 (Agencies): India tetsür Hockey team-i Bodhbarnü Rajgir Hockey Stadium nung Women's Asian Champions Trophy 2024 kokogo. Final nung parnoki goal 1-0 agi China koka liasü.

Asaya mezüngbuba shilem nung team anaprongla kanga toktepa asaya, saka asaya tanabuba shilem nung Deepika-i goal ka idaktsüba ajanga India-i iba asayamung koka liasü.

Bihar sorkari Indian women's hockey team nung asayar shia nem sen lakh 10 agütsütsü telemtetba agiogo.

"Rajgir Hockey Stadium nung asayamung tepeyong kanga junga asayaba atema sen lakh 10 agütsütsü," ta Bihar sorkar-i metetdaktüsü.

Chief coach Harendra Singh aser pa indang support staff tema Chief Minister Nitish Kumar-i aniba sorkar

yagi senpettsütsü.


"Iba den bendenloksema chief coach Harendra Singh nem sen lakh 10 aser tanga support staff tem nem sen lakh 5 agütsütsü," ta kasa sangdong ajanga metetdaktüsü.

Küm aika lir Bihar nung tang mezüngbuba tongtibang hockey asayamung ka ayongzüka asayaogo aser India tetsür team asaya reprangtsü asoshi asaya shia nüburtem sünga adenshia liasü.

Women's Asian Champions Trophy Rajgir 2024 akokba sülen Hockey India-ia India tetsür team nung asayar shia nem sen lakh 3 aser support staff ajak nem sen lakh 1.5 agütsütsü ta sangdongogo.

Asian Hockey Federation-ia tang mezüngbuba asayamung nung takok angurtem nem senpet agütsütsü sangdongogo. India team nem senpet USD 10,000, China nem USD 7000 aser Japan nem USD 5000 agütsütsü.

Italy-i Slovakia koka Billie Jean King Cup 5benbuba kokogo



Jasmine Paolini

Yimpoksüi/November 21, 2024 (Agencies): Bodhbarnü Billie Jean King Cup final nung Jasmine Paolini-i Rebecca Sramkova koka Italy tetsür team-i 2-0 agi Slovakia kokogo. Italy team-i tang agi pongubenbuba iba asayamung kokogo.

World number four Paolini-i tanbuba kija asaya nung 6-2, 6-1 agi Sramkova koka liasü. Iba masüdag mezüngbuba kija asaya nung Lucia Bronzetti-i 6-2, 6-4 agi Viktoria Hrunckova koker liasü.

Taoba küm final asaya nung Italy-i Canada makok, ajisüaka Malaga nung final asaya parnoki koka 2013 küm sülen tang mezüngbuba iba asayamung kokogo.

Taküm Roland Garros aser Wimbledon na nung tanabuba jenjang nung tembangba sülen tang iba asayamung koka Paolini takok nung küm

tembangogo.

"Billie Jean King cup koka küm tembangtsü ya tamamangtsüka aser jangrademtsüka, o agi rasa ashitsü makoker," ta Paolini-i ashi.

"Taküm onoki iba asayamung kokteta kidangi takok marok bener otetba atema kanga pelar," ta laisa shisem.

Slovakia, shirnoki 2002 küm iba asayamung kokogo, parnoki Spain nung BJK Cup nung khen danga tamakok mongui liasü.

Parnoki taküm USA, Australia aser Great Britain koka final tonteta liasü, ajisüaka final nung parnok atema Italy team ya kanga tashi tait liasü.

Captain Tathiana Garbin-i aniba Italy team yagi Iga Swiatek'er Poland team aser Japan dena koka iba asayamung kokogo, koba dang 'World Cup of Tennis' ta ajar.

BILEMDANGANG

"Nisung ajak pei yari tagidak lir."